

潮州府志
(乾隆)
八

ISBN 988-978-316-9



9 7 8 9 8 8 9 7 8 3 1 6 7 1

二〇〇六年三月

中國海疆舊方志

選題組織策劃：蝠池書院出版有限公司

發行者：蝠池書院出版有限公司

出版者：蝠池書院出版有限公司

香港九龍旺角花園街二十六號好景商業中心二十三樓二三〇九室

電話：〇〇八五二一六五五九二三七〇

傳真：〇〇八五二一三三八八七九〇〇

定價：人民幣 九五〇〇〇元（全書共三百一冊）

潮州府志 卷三十三

乾隆辛巳重修

潮州府知府周碩勳輯

宦蹟

春秋載列國名卿大夫尚矣漢詔良二千石久
任不易璽書褒嘉增秩而賜之金盧江穎川渤
海南陽治行卓卓千古慕循良焉夫太守吏民
之本立化成俗如置水盤盂中方圓隨其所制
固不徒習文法飾吏事之為鰓鰓也潮為要郡
代有名賢而白沙稱韓與王為最況際

聖朝澄敘官方吏治駸駸日上守土者果謹身帥先

利民之事知無不爲豈復讓美前修哉志宦蹟

六朝

蔡景歷字茂世濟陽考城人少俊爽有孝行家貧好學善尺牘工草隸解褐爲諸王府佐授海陽令爲政有能名侯景亂梁簡文帝爲景所幽景歷與南康嗣王蕭會理謀欲挾簡文出奔事泄見執賊黨王偉保護之獲免因客遊京口侯景平陳高祖鎮朱方素聞其名以書要之景歷對使答書高祖嘉賞賜書報答授北府中記室參軍承聖中授通直散騎侍郎高祖將討王僧辯獨與侯安都等數人

謀景歷弗知也部分既畢令草檄景歷援筆立成
辭義感激事皆稱旨僧辯誅高祖輔政除從事中
郎高祖受禪遷秘書監中書通事舍人掌詔誥永
定二年坐妻弟劉淹詐受周寶安餉馬降中書侍
郎三年高祖崩時外有彊寇朝無重臣宣后呼景
歷及江大權杜稜定議乃秘不發喪疾召世祖景
歷及內人密營斂服時盛暑須治梓宮恐斤斧聲
聞於外以蠟爲秘器文書詔誥依舊宣行世祖卽
位復爲秘書監以定策功累遷散騎常侍天嘉六
年坐妻兄劉洽受歐陽武威餉絹百匹免官廢帝

卽位起爲諮議參軍太建五年都督吳明徹北伐所向克捷與周將梁士彥戰於呂梁大破之斬獲萬計方欲進圖彭城是時高宗銳意河南以爲指麾可定景歷諫稱師老將驕不宜過窮遠畧高宗怒爲飛章劾其贓汙削爵土徙居會稽及吳明徹敗帝思景歷前言復爲諮議參軍拜御史中丞復本爵是歲以疾卒官年六十正明元年配享高祖廟二年親幸其宅重贈景歷侍中中撫將軍諡曰忠敬給鼓吹一部景歷屬文不尙雕靡而長於敘事機敏速爲當世所稱有文集三十卷

唐

張元素蒲州虞鄉人隋末由刑部令史任景城縣曹
竇建德陷景城被執將殺之邑人千餘號泣請救
命釋縛署治書侍御史固辭煬帝已弒始受黃門
侍郎秦王平建德聞其名以爲景州錄事參軍卽
位召見問以治道言隋室其君自專其法日亂一
日萬幾必欲自決中者信善其不中者日以繼日
乖謬旣多不亡何待若使上賢右能百司善職疇
敢犯之帝稱善拜侍御史尋遷給事中正觀四年
詔修洛陽宮乾陽殿以備東幸上書言不急之務

徒然虛費今百姓承亂離之後財賦殫空雖蒙更
生意未完定奈何重耗其力故阿房成秦人散章
華就楚衆離乾陽畢功隋人解體帝稱善魏徵聞
之歎曰張公論事有回天之力可謂仁人之言哉
令傅太子承乾兼少詹事屢上疏規以苟違天道
人神棄之古昔三驅非以教殺以除民害不宜反
玩爲娛有損盛德太子不納帝聞擢銀青光祿大
夫太子憚其嚴夜遣戶奴狙擊幾危得脫復上書
曰周武帝平山東卑宮陋食以安海內而太子贊
有穢德帝慈仁不忍廢及踐祚狂暴宗祀以亡故

隋代之至楊勇爲太子驕肆敗度當是時自謂秦山之安詎知一旦失國今上以殿下父子至親故所資用不爲限節然詔未六旬用踰七萬龍樓望院悉爲工匠之肆深官禁門無異闐闐之區皆不納及太子被廢例坐除名頃之召授潮州刺史高宗時以老致仕卒

唐臨字本德長安人周內史瑾孫自北海內徙少有令名武德初以破王世充策干隱太子授右衛率府鎧曹參軍太子廢出爲萬泉丞有囚十餘人久繫白令使就畝畝相與定約如期而還由是知名

再遷侍御史整肅朝儀韋挺爲大夫越次與江夏
王道宗語劾以亂班衆悚慄俄持節按交州刺史
李道彥獄伸理冤繫出三千人轉黃門侍郎加銀
青階高宗卽位遷大理卿嘗問在獄繫囚之數占
對稱旨帝喜曰爲國之要在於刑法刻則人殘寬
則失罪惟是折中以稱朕意又嘗親錄囚前所斷
者輒呼叫稱冤獨臨所錄無一言帝問故答曰唐
卿無冤所以絕意帝歎曰爲獄者固當若是乃自
署其考曰形如死灰心若鐵石永徽元年拜御史
大夫會廣州御史蕭齡之受賕當死詔羣臣議請

論如法臨言律有入議齡之齊高帝五世孫當在
議親議貴之列帝然之由是免死拜刑部尙書加
金紫光祿大夫復歷兵吏度支三部尙書坐與來
濟善免官起爲潮州刺史卒年六十爲人儉泊寡
欲不治第宅服用簡素寬於待物專務掩人過見
妻子必正衣冠有冥報記二卷

常懷德新豐人少習三禮由明經歷仕郡邑有聲高
宗儀鳳間爲潮州刺史厓山賊寇郡遣兵討之戮
其渠魁以徇餘黨悉散爲政務禮教郡中喪祭鮮
用浮屠澆風爲之一變

李臯字子蘭少補左司禦兵曹參軍天寶十一載嗣
王事母鄭太妃以孝聞祿山反奉母間道走蜀謁
元宗由都水使者遷左領將軍上元初請外補溫
州長史俄攝州事歲饑發官廩以活餓者先發後
聞晉少府監時侍御史李鈞與弟法曹參軍鏐宦
遊二十年不還鄉其母窮老不自給臯劾罷除名
召還上書言治道授衡州刺史緣事坐貶楊炎知
其直復爲潮州刺史建中元年遷湖南觀察使值
前辛京杲以貪虐激變部將王國良據武岡以叛
討之不克臯單騎造其壘賊延入大呼曰有識曹

王者乎今在此一軍愕眙不敢動國良迎拜叩頭
請罪執手約爲兄弟於是盡焚攻具悉散其兵居
母喪會梁崇義反起復左衛大將軍復觀察湖南
尋加散騎常侍李希烈反遷江西節度使以討希
烈功晉工部尚書正元初遷荆南節度使凡戰大
小三十二取州五縣二十斬首三萬三千生擒萬
六千未嘗敗北師所過不伐桑棗踐禾稼朝廷仰
食江淮道出九江至大別皆與賊接數千里餉道
常通江漢倚臯爲固淮西平請護喪歸東都遣中
人贈弔贈父右僕射母曹國太妃訖葬來朝還就

珠蘭書屋

鎮築江陵東北傍漢古隄得良田五千頃規江南
廢洲爲廬舍構二橋跨江以居流人二千餘家由
荆抵樂鄉二百里間人苦遠汲臯命鑿井民便之
正元初吳少誠擅蔡故徙臯鎮山南東道少誠畏
之素性勤儉能知人疾苦參聽微隱盡得吏下短
長賞罰必信所至常平物價豪右不得擅其利兼
有巧思戰艦下挾二輪鼓水疾駛如陣馬凡所造
作皆用省而利長每遣人以物必自察視衡量庫
帛皆卽署以杜吏謾年六十卒贈尙書右僕射諡

曰誠

常袞京兆人父無爲三原縣丞袞登天寶末進士授
太子正字遷右補闕至起居郎寶應二年拜翰林
學士歷考功員外郎知制誥永泰元年遷中書舍
人文采瞻蔚同列楊炎性孤介不妄交遊時稱袞
後與楊綰同政綰卒袞始當國元載於政事堂闢
後門令室之嚴禁賣官以革前弊然一意謝絕中
外百司奏請皆執不與中書之權至比冗衙尤排
擯非由科第及文學者由是選路大壅省中至缺
侍郎世咸謂之齶伯以齶齶無賢不肖之辨也已
亦並無勳爵散官纔朝議郎郭子儀爲言始加銀

青光祿大夫封河內郡公德宗初立與祐甫不睦
至相忿爭貶爲河南少尹再貶潮州刺史建中初
楊炎起爲福建觀察使大溥教化卒於官年五十
五贈左僕射

韓愈字退之鄧州南陽人父仲卿秘書郎愈生三歲
而孤隨伯兄會貶官嶺表會卒嫂鄭氏鞠之擢進
士第調四門博士遷監察御史上疏極論官市德
宗怒貶陽山令元和初遷職方員外郎貶封溪尉
執政奇其才改比部郎中憲宗將平蔡命御史中
丞裴度使諸軍按視及還言賊可滅與宰相議不